

東
華
續
錄

東華續錄

同治九十九

臣王先謙敬編

臣張式恭恭校

同治十三年甲戌春正月乙巳朔元旦節停止筵宴○庚戌諭劉
坤一等嚴緝江西教匪○辛亥祈穀於上帝○諭軍機大臣等
都興阿等奏拏獲金州屬界械鬪賊首正法一摺賊首宋帽倡糾
眾在金州尹家屯地方與高希田械鬪殺傷多人業經總兵張得
祿等帶隊擒獲正法並將此股匪徒撲滅辦理尙屬妥速惟高希
田卽高退愚亦有在岫巖界坎子下屯地方糾匪搶劫情事見在
全家逃入海洋亟應查拏懲辦著都興阿清凱志和恭鏗嚴飭所
屬旗民地方官各處搜緝並著文彬檄令所屬各州縣及沿海一
帶一體捕拏務獲盡法懲治以絕根株而杜後患所有此次出力

官弁兵勇著准都興阿等擇尤酌保毋許冒濫將此由四百里各諭令知之○壬子諭軍機大臣等景廉奏陝回攻撲上馬橋派兵援剿錫綸奏擬撤蒙兵暨副總管於兵潰後隨時破賊請免議罪各摺片陝回白彥虎率黨攻撲上馬橋景廉以徐學功兵力甚單派令沙克都林扎布帶隊馳援該逆人數眾多意在掠糧占踞要隘沙山子地方素稱產糧之區且爲西進大兵要道上馬橋距沙山子僅數十里該處稍有疏虞則沙山子新渠等處皆形喫緊徐學功所部止有三營兵力實形單薄前經諭令榮全飭令駐紮沙灣之孝順一軍迅速馳往會剿並諭令景廉於就近各軍如有應撥之處卽行調遣以期無誤兵機何以孝順一軍屢催未到著榮全卽飭孝順迅速統兵前往會埽逆氛該處軍情緊急儻各軍任意延緩必致貽誤事機著景廉嚴催孝順所部速往應援如再遲

延卽由該都統嚴行參辦兵事旦夕異宜應敵豈容稍緩嗣後各軍儻有不遵調遣者卽著景廉指名嚴參以肅軍令沙克都林扎布所帶各隊景廉卽飭令會同徐學功認真防剿以待援軍錫綸所部無多並著該領隊大臣統率前進會同孝順沙克都林扎布兩軍進駐沙山子扼要防剿務將該逆合力殲除毋任蔓延爲患副總管蒙庫吉噶噶爾所帶蒙兵聞賊卽潰不能得力錫綸擬將此項蒙兵裁撤騰出餉銀招募民勇卽著咨明榮全景廉英廉巴彥特古斯等將此項蒙兵內由錫綸酌畱二百名應用其餘悉數裁撤該兵月餉卽於出奏之日停止以節糜費蒙庫吉噶噶爾在烏梁海所屬之柯柯莫敦軍臺地方遇賊敗潰實由烏梁海部眾聞警遠避又因蒙兵驚潰以致失機姑念其於兵潰後尙能收集殘眾隨同破賊蒙庫吉噶噶爾著免其議罪將此由五百里各諭

令知之○撥部庫銀二十萬兩充景廉軍餉○甲寅諭軍機大臣等王文韶奏楚軍追剿丹古亂苗逸賊悉數殲除防境肅清一摺苗匪李官保等句結古州逆酋李公雞於上年十月間竄至咱刀地方經王文韶飭令提督龔繼昌等會合黔軍進剿先後斃賊多名並將首逆李官保等生擒正法李公雞乘夜逃逸復經我軍擒獲梟示防境均已肅清在事出力各員并准其彙案擇尤保奏惟苗民性多反覆難保不別滋事端仍著曾璧光督飭地方官妥爲鎮撫並將善後事宜次第興辦毋令再生反側王文韶當於湘黔交界一帶隨時防範如有苗匪稍形蠢動卽當不分畛域會同剿辦以遏亂萌將此由五百里諭知王文韶曾璧光並傳諭周達武知之○諭承繼等奏達賴喇嘛下山率領僧眾親赴大招攢招率經爲賴喇嘛擬於本年正月閒下山率領僧眾親赴大招攢招率經爲

國祈福具見惻忱洵堪嘉尚卽著承繼等前往布達拉山妥爲照料並發去黃哈達一箇銀曼達一箇鈐杵一分菩提念珠一串玉碗一箇玉杯一箇小卷五絲段二卷傳諭該達賴喇嘛祇領用昭恩賚將此各諭令知之○乙卯以恭謁西陵修理亭座諭李鴻章迅撥銀六千兩交清安辦理○丙辰諭內閣左宗棠奏請簡漢中鎮總兵一摺陝西漢中鎮總兵員缺著楊長春補授向來提鎮缺出均由特簡且見在各軍營俱有記名人員候旨簡放此次左宗棠將周紹濂等開單呈覽殊屬非是嗣後各督撫務恪遵定例不得列名請簡以符體制○諭禁廣東闖姓賭博○命翰林院編修張英麟檢討王慶祺在弘德殿行走○丁巳諭軍機大臣等瑞麟張兆棟奏越南股匪與法國兵互相攻擊情形未定擬請固守邊圉相機籌辦各摺片法南與越南構兵踞其河內省城股匪劉

泳幅等乘機肆擾與法兵互相攻擊見聞法國已與越南議和因股匪猖獗回國添兵往剿該國事勢紛紜情形未定自當扼要駐紮固守疆圉未便越境用兵轉致生事瑞麟等已檄鄭紹忠帶勇二千名馳赴欽州附近扼紮著飭令該總兵隨時查探遇有越南匪徒竄至邊界立即會同地方文武實力堵剿其洋面交界處所並著認真防堵毋任竄越粵西防軍向紮越南高平諒山二省已由瑞麟等知照法國領事毋得進兵侵犯該處楚軍亦不向河內轄境前進免致互啟猜疑有傷和好著劉長佑飭令覃遠璉等遵照辦理太鎮南甯三府均與越南毗連該撫當妥爲布置以固邊防廣東按月應協廣西餉銀二萬兩仍著瑞麟等隨時籌措源源接濟毋稍推諉將此由五百里各諭令知之○允張樹聲奏於蘇州府城建淮軍昭忠祠○辛酉諭吏部奏遵議大員處分請分別

革職革任各一摺降調左都御史胡家玉著加恩改爲降五級調用江西巡撫劉坤一加恩改爲革職畱任降爲三品頂帶○趣金順赴古城會景廉等規復烏魯木齊各城○景廉以疾乞免不允仍予假一月調理○諭戶部每月添撥榮全軍餉銀一萬兩○癸亥諭軍機大臣等文彬奏覆查東明石莊戶口門難以施工應請緩辦一摺文彬親往石莊戶等處詳細查勘丁寶楨所議堵口築隄之舉時日旣迫形勢又復變更難以興辦該署撫擬於趙王河以北金隄以南修築長隄知會李鴻章將東明一帶與濮州毗連處所一律接修並於荷澤等境勸諭居民各修隄埝籌堵石莊戶下游支流趙王河南岸修月隄一道以爲屏蔽汶口之計卽著文彬督飭委員妥籌辦理所需銀兩卽由該省籌款奏明動支並著李鴻章飭令東明一帶地方接修長隄以資保衛黃水擠清下注

江北下游亟應豫籌防範著李宗義張樹聲會同喬松年恩錫詳悉勘明擇要修守所有各該省應修各工李鴻章等務當悉心酌度妥速籌辦以捍水患而衛民生前經部撥銀三十萬兩著文彬咨令各省解赴漕運總督衙門交納以備江北辦工之需將此諭知李鴻章李宗義喬松年文彬張樹聲並傳諭恩錫知之○以山西邊防解嚴撤大同官兵歸伍裁歸綏糧臺○丙寅允常順等奏調察哈爾新兵五百名駐科布多撤分駐科城之吉林黑龍江官兵回烏里雅蘇台裁烏城原駐蒙古防兵○丁卯諭內閣本年恭謁西陵前年久失修有應行改道處所均須開用民田所有應徵同治十三年糧租著全行豁免仍著李鴻章查明頃畝數目酌給籽種以示體恤○子雲南殉難道員林廷禧等建祠○戊辰加賞順天通州賑米四百石○諭戶部於新疆月餉內指撥厄魯特

營餉每年二萬兩○己巳諭內閣禮部奏議結覆勘試卷一摺上年癸酉科江南等省試卷經派出大臣覆加磨勘當將應議試卷交部覈議茲據該部詳查條例將此次籤出應議各試卷分別斥革停科及正副考官同考官受卷謄錄對讀各官應議之處繕單呈覽江南舉人楊楫著卽行斥革正考官劉有銘副考官黃自元均著降二級調用同考官朱泰修著卽革職○庚午以黃鉉爲刑部左侍郎由內閣學士遷○是月蠲緩直隸天津等二縣窪地上年額賦暨民借倉穀兩浙仁和等十場荒田暨被災上年竈課緩徵山東濟甯等四十一州縣德州等四衛東平所被水被旱被蟲上忙額賦雜課展緩直隸定州等四十八州縣被水春徵額賦祁州等二十州縣節年民欠糧租江西蓮花等二十七廳縣南昌等二衛被水新舊額賦雜課

二月丁丑春分朝 日於東郊○戊寅祭 大社 大稷○庚辰

予故江蘇道員袁保慶附祀原任漕運總督袁甲三本籍專祠○

辛巳以鄉試中卷文多疵謬諭禮部申明科場條例○飭山東等

省迅解景廉軍餉○壬午以袁保恆爲內閣學士

由詹事遷

童華爲左

副都御史

降調侍郎

○丁亥諭禁各省私設釐卡○諭文祥等籌議東

三省緝捕章程○庚寅加賞普濟堂功德林賑米二百石銀四百

兩展期兩月○辛卯 上御紫光閣閱侍衛等騎射○甲午 上

再御紫光閣閱侍衛等騎射○裁江南淮揚鎮遊擊一守備把總

各二外委六兵二千四百三名○丙申諭軍機大臣等岑毓英奏

探聞越南軍務喫緊籌辦滇省邊防一摺越南河內省城被法國

帶兵攻破並有匪徒黃崇英等乘機攻襲太原山西勢頗猖獗雲

南開廣臨安轄境與越南所屬宣光等處接壤恐有外匪闖入句

結該處回夷滋事岑毓英見派提督李文益等馳往探明賊情將沿邊防堵事宜豫爲布置卽著飭令該員等會同地方官隨時認真防範以期有備無患越南各匪鴟張該撫慮其假冒外國名色濶入滇境或捏稱滇省兵練傷及法人致啟釁端著總理各國事務衙門照會法國使臣轉行見駐越南之領事各官俾知滇省派兵防邊係堵剿越南各匪與法兵不相干涉毋啟猜疑如欲遊歷入滇俟越南平靖道路暢通後方可前往岑毓英惟當隨時加意籌畫慎固封守期於中外相安以免另生枝節另片奏巴蠻不時竄擾擬撥隊巡防等語著照所議卽將昭通等處標兵挑補足額分派一半前往金沙江外駐紮巡守輪替更換勤加操練前設勇營著卽行裁撤以復營制而固邊防將此由四百里諭令知之○

諭禁京師私鑄○諭吳棠等迅解貴州欠餉○丁酉 上奉 慈

安端裕康慶皇太后 慈禧端佑康頤皇太后啟鑾謁西陵○免
蹕路經過直隸宛平等六州縣錢糧十分之三○己亥賞守護行
宮兵丁半月錢糧○庚子 上謁 泰陵 泰東陵 昌陵 昌
西陵 慕陵 慕東陵○辛丑 上奉 慈安端裕康慶皇太后
慈禧端佑康頤皇太后回鑾○是月蠲緩廣西左州等二十七
州縣被擾額賦

三月甲辰 上奉 慈安端裕康慶皇太后 慈禧端佑康頤皇
太后還宮○丙午命吏部尚書寶鋆協辦大學士○丁未諭內閣
本年補行覆試日期較早各省續到之未經覆試舉人不能一體
會試未免向隅自應量爲變通以示嘉惠士林至意著禮部查明
此次如有未經覆試舉人准其先行會試俟會試後再令補行覆
試儻覆試時有應行罰科等事仍著該部知照知貢舉照例辦理

嗣後各直省應行覆試舉人務當及早晉京如期應試毋許任意

遲延此係破格加恩嗣後不得援以爲例○己酉以龔自閎爲內

閣學士

由太常寺卿遷

○庚戌允載遷等奏撥長蘆鹽務銀五萬兩發商

生息備永濟籌備二庫支放○辛亥諭軍機大臣等前因文彬奏

覆查東明石莊戶口門難以施工擬於趙王河等處築隄修埝當

經諭令李宗義等於江北下游豫籌防範擇要修守茲據奏稱上

年侯家林以南王老戶等處又復潰決其分流入運者擠清下注

江鏡銅沛一帶湖田被淹若罷堵口之議下游更難防範請飭山

東巡撫籌堵缺口等語著文彬詳加籌度如石莊戶口門實難施

工卽先將王老戶等處民埝缺口竭力籌堵以免黃水下注貽患

江北李宗義等所籌江北各屬備禦情形卽著督飭派出各員認

眞辦理不可有名無實徒託空言原摺著鈔給文彬閱看將此由

四百里諭知李宗義張樹聲文彬並諭恩錫知之○壬子以甘肅農業久荒詔免同治十三年以前積欠錢糧○癸丑諭內閣吏部奏遵議臬司各員處分一摺雲南按察使程誠於遊擊楊玉麟被毆斃命延不審結致釀重案前署會澤縣知縣任傳綸不能約束差役復不照例相驗實屬咎有應得程誠任傳綸均著降二級調用不准抵銷任傳綸並有疏脫重犯案懸不結情事著照部議降一級調用毋庸查級紀議抵○諭給事中邊寶泉奏覆試舉人試卷出入太重請飭會議一摺所有覆試舉人謝煥章試卷著派桑春榮彭久餘會同禮部秉公查覈具奏○諭鮑源深迅解烏科兩城經費銀兩○甲寅 上幸圓明園○還宮○予故戶部尚書署陝甘總督沈兆霖於甘肅平番縣建祠○乙卯以倉景恬爲雲南按察使前湖南按察使○丙辰諭軍機大臣等張廷岳等奏竄匪盤踞蒙

古地方請將蒙兵暫緩遣撤一摺賊匪竄踞諾彥山之套賴商達地方經伯克瓦齊爾帶領蒙兵追剿獲勝斃匪多名惟賊匪見尙盤踞額哲尼河崇庫克地面該處爲烏庫兩城適中之地亟須卽時剿洗以免日久蔓延所有伯克瓦齊爾所帶蒙兵二百名著准其暫緩遣撤其額爾德尼招所駐蒙兵三百名著暫行遣撤仍聽候調撥並著張廷岳阿爾塔什達妥爲籌布一面知照烏城派兵會剿一面飭令伯克瓦齊爾勤加偵探遇賊卽擊仍當穩慎防剿毋稍疏虞將此由五百里各諭令知之○丁巳命五城煮賑展期兩月○庚申諭軍機大臣等金順奏料理出關事宜暨查拏黎獻所部潰勇各摺片金順見派提督劉宏發統帶禮字五營作爲前隊徑赴巴里坤續購駝隻此時計已到營卽著親督馬步各營前往安西一帶暫紮迅將存儲玉門之糧運赴安西剋期拔營西進

馳赴古城與景廉籌商進取毋再耽延致誤事機托雲佈等所統各營亦卽飭令接續前進以厚兵力金順出關後該軍轉運事宜仍著左宗棠隨時力籌兼顧俾免缺乏額爾慶額張曜何時出關並著該大臣將糧餉轉輸各節設法兼籌毋稍推諉前據李瀚章左宗棠先後奏稱道員黎獻帶勇未能得力所募勇丁亦不足恃曾諭景廉查奏今黎獻所募之勇暫紮肅州不過二百餘人尙未出關已有糾夥潰散並槍斃提督于奇泮情事不法已極除首犯汪幅齊等經金順拏獲正法外在逃未獲各案著左宗棠金順飭令沿途地方官及各路防軍一體緝拏務獲嚴行懲辦毋令漏網黎獻所部勇丁潰逃辦理不善咎實難辭著先行交部議處並著景廉認真察看如黎獻實難得力卽行據實奏參毋稍遷就未逃勇丁應如何分別遣留並著酌度辦理原片著鈔給景廉閱看將

此由五百里各諭令知之○辛酉追予故貴州巡撫蔣霽遠諡勤

慤建祠○以貴州軍務肅清予劉嶽昭曾璧光周達武優敘提督

何世華等世職獎擢有差予陣亡總兵官鄧仁和等祭葬世職○

壬戌諭閩粵兩省海關每年各撥銀二萬兩備奉天兵餉○乙丑

予哈密陣亡參將張忻等祭葬世職○丙寅諭瑞麟等籌解雲南

欠餉○庚午諭內閣本日桑春榮彭久餘會同毛昶熙黃倬奏覈

覆已革舉人謝煥章試卷請免其斥革仍照疵類例罰停會試一

科又據禮部奏謝煥章仍請照前議斥革各一摺除原派閱卷大

臣禮部堂官及此次所派之桑春榮彭久餘毋庸會議外著九卿

會議具奏○左宗棠奏臣前奏出關諸軍饋餉盈絀隱繫軍情急

須體察一片欽奉硃批該部速議具奏旋准戶部鈔錄原摺奉旨

依議欽此臣維出關諸軍見惟金順張曜額爾慶額三起除額爾

慶額所部馬隊由穆圖善派交吉林二百騎黑龍江一百騎額爾慶額自挑涼州滿營百騎外臣撥交總兵桂錫楨馬隊一營一起共三百七十五騎歸其統帶應領月餉糧料運腳等項穆圖善撥交者由穆圖善支應桂錫楨一營一起由臣支應其涼州滿營之一百騎亦由臣支應不計外張曜一起步十二營馬二營業經張曜開報其糧料運費由河南支應金順併統成祿舊部馬步雖名三十餘營然步隊照五百人一營實數馬隊照二百五十騎一營計算金順自定二十營此外又由臣撥交副將馮桂增馬隊一營總計金張額三軍馬步約共一萬七千餘名騎並明春所帶成祿舊部二千餘名騎合計在內加之員弁丁役人夫則近兩萬矣以糧料價值轉運腳費而言計由涼甘採運肅州由肅州轉運玉門安西州所需民運車騾馱隻腳價員弁人夫薪糧牲畜草料口袋

什物局費一切均勻攤算每糧百斤約需銀十一兩七錢上下料價稍減而腳價則一運道近則腳價猶少運道遠則腳價增多見籌出開轉運腳價多於糧價數倍者兵燹之後人物彫殘絲毫不能借資民力與承平時迥異無論予遺之民尙須官賑賑糧尙須官運也臣於上年十二月初十日拜發各摺片業經詳細陳明而以餉饋盈絀隱繫軍情急須體察懇飭戶部兵部會議者以此茲戶部奏稱向來各路軍營餉需及一切雜支均由各該大員酌量情形查照例章覈定數目奏請由部指撥從未有先由部臣覈定者又稱出關各營共計幾營每營弁兵若干每月所需正餉若干其糧料價值運費按照時價貴賤道里遠近計算共需若干戶部均屬無從知悉請旨飭下左宗棠查明出關各營弁兵實數所需正餉糧料運腳等項按照例章並體察關外情形每月實在需銀

若干及出關各營原撥餉項分晰聲敘先行奏明臣維見在出關各軍除額爾慶額馬隊各營由臣與穆圖善撥交其餉糧轉運腳價由穆圖善與臣餉項內照舊劃給毋庸另籌宋慶一軍正需整理暫毋庸議其金順一軍除臣撥交馮桂增馬隊一營餉項亦由臣劃給毋庸另籌其自統各營及接統成祿舊部馬步共二十營張曜所部馬步十四營已經陳明在案惟臣於金順張曜宋慶各軍餉項餉章無從知其詳細上年在肅晤談僅得其梗概部議向來各路軍營餉需及一切雜支等項均由各統兵大員酌度情形查照例章覈定數目奏請由部指撥是金順等應奏部臣應撥與臣無干自可無庸置喙其糧料價值時估不同斗石大小斤兩輕重互異以及轉運里數遠近均經臣據實陳明若逐項分晰聲敘未免繁瑣且金順至古城張曜至哈密一切又須從新算起諸軍

有無例章可查情形應由其酌度數目應由其覈定臣亦無能代籌也臣前因各軍馬步兵勇所得實餉僅三兩有奇按照糧料價值攤扣儘數賠繳尙須找銀繳局若不攤扣則糧料價值轉運腳費等項又將無出原係實在情形事繫軍情既有見聞不敢緘默故將餉數糧價運腳詳悉陳明上瀆聖聰請飭部會議一免諸軍藉口一期迅赴戎機至應否酌中定議諸軍餉饋均歸有著之處無可查照無從覈定仍應由戶兵兩部會議得旨該部議奏○辛未諭軍機大臣等總理各國事務衙門奏日本兵船見泊廈門請派大員查看一摺日本國使臣上年在京換約時並未議及派員前赴臺灣生番地方之事今忽興兵到閩聲稱借地操兵據英國使臣函報日本係有事生番並據南北洋通商大臣咨覆情形相同事關中外交涉亟應先事防範以杜釁端李鶴年於此等重

大事件至今未見奏報殊堪詫異生番地方本係中國轄境豈容日本窺伺該處情形如何必須詳細查看妥籌布置以期有備無患李鶴年公事較繁不能遽離省城著派沈葆楨帶領輪船兵弁以巡閱爲名前往臺灣生番一帶察看不動聲色相機籌辦應如何調撥兵弁之處著會商文煜李鶴年及提督羅大春等酌量調撥至生番如可開禁卽設法撫綏駕馭俾爲我用藉衛地方並著沈葆楨酌度情形與文煜李鶴年等悉心會商請旨辦理日本兵船到閩後作何動靜著文煜李鶴年沈葆楨據實具奏南北洋如探有確耗並著李鴻章李宗義隨時咨明總理各國事務衙門覈辦原摺均著鈔給閱看將此由六百里各密諭知之○諭總理各國事務衙門奏必嚕使臣來津請派大臣辦理等語已另有諭旨派李鴻章爲全權大臣與該國使臣商會事務矣必嚕國前有虐

待華工之事李鴻章務將此事與之辯論明晰先立專條再議通商條約事務本日簡派全權大臣諭旨一道一併發往如該使臣索看憑據卽著李鴻章另行恭錄給與閱看俟議辦事畢此旨仍繳還軍機處備查將此諭令知之○命欽差大臣大學士直隸總督李鴻章與必魯國使臣會商事務○是月蠲緩陝西邠州等四十八州縣被擾舊欠額賦

夏四月癸酉朔享太廟○甲戌詔撥戶部銀十萬兩撫恤烏里雅蘇台被災被擾部落○諭左宗棠籌解關外軍糧○丙子常雩祀天於圓丘○丁丑上幸瀛臺○大學士單懋謙因病乞休允之○俄羅斯國使臣布策等於紫光閣前瞻觀○戊寅諭軍機大臣等前據總理各國事務衙門奏日本兵船見泊廈門聲稱借地操兵並據英國使臣及南北洋大臣咨報該國有事臺灣生

番地方當派沈葆楨帶領輪船兵弁以巡閱爲名前往臺灣一帶密爲籌辦福建布政使潘蔚早經陛辭出京卽著馳赴臺灣幫同沈葆楨將一切事宜妥爲籌畫會商文煜李鶴年及提督羅大春等酌量情形相機辦理潘蔚見在行抵何處並著張樹聲查明催令迅速赴閩兼程前往不得稍涉遲延將此由五百里密諭沈葆楨文煜李鶴年張樹聲並傳諭潘蔚知之○庚辰諭內閣前因桑春榮等奉派覆覈已革舉人謝煥章覆試卷與禮部意見不同分別覆奏當經諭令九卿會議茲據奏稱查閱謝煥章試卷用意艱深語多晦澀致被擯斥弗錄不爲無因禮部因係不列等擬以斥革係照成案辦理惟卷內雖有未妥之句尙非文理不通等語謝煥章著仍照桑春榮等所議開復舉人罰停會試一科嗣後禮部於科場事宜仍當恪遵舊章秉公辦理此次係屬破格施恩不得

援以爲例前據給事中胡毓筠奏稱謝煥章試卷萬青藜背誦其
文謂不列等未免屈抑等語萬青藜於此卷既擬查照成案斥革
舉人乃於未經奏結之先輒以屈抑向人傳誦殊屬不合萬青藜
著交部議處○諭軍機大臣等總理各國事務衙門奏俄人久踞
伊犁一摺榮全前與俄官會議收回伊犁迄無成說近更覬覦伊
城附近地方該國駐京使臣布策經總理各國事務衙門與之剖
辯允爲行查彼國其言未足深恃若再不亟圖進取辦理更無把
握察哈爾馬隊計已馳抵塔城榮全兵力稍厚著卽將各營力加
整頓先期布置一面與景廉各軍聲息相通妥爲籌畫毋誤事機
瑪納斯烏魯木齊等城必須剋期收復方可爲規復伊城進步著
左宗棠催令出關諸軍迅速西進會同景廉籌商進剿迅將各城
踞賊次第蕩平期與榮全聲勢聯絡以靖邊氛原摺均著鈔給閱

着將此由五百里各密諭知之○辛巳 上幸圓明園○還宮○
癸未諭軍機大臣等榮全奏前敵剿賊失利並請飭金順景廉撥
隊助剿暨飭部補撥欠餉各摺片逆首小虎雖已竄回瑪納斯城
難保不復行紛竄並有攻撲沙山沙灣西湖等處之信亟應嚴密
防範著榮全飭令孝順沙克都林扎布等勤加偵探遇有賊匪西
犯務當會合夾擊力挫兇鋒榮全軍營兵力甚單亟應撥兵援助
著景廉卽飭吉爾洪額統帶黑龍江一軍並添撥吉林馬隊二百
五十名星速前往西湖毋稍延緩金順此時行抵何處著卽分撥
勁旅二三千名飭由沙山徑赴西湖會合各軍以資助剿據榮全
奏該處行營及庫爾喀喇烏蘇軍營需餉甚殷所有戶部欠撥該
處同治十一年十一月至十二年二月共四箇月月餉銀五萬二
千兩卽著補行撥發交榮全領餉委員運解回營以應急需將此

由六百里各諭令知之○以關內道路疏通改甘肅安敦玉三州縣仍歸總督節制○乙酉諭軍機大臣等前因李宗義奏黃流擠清入運請飭東省籌堵王老戶莊等處民埝缺口以免貽患江北當經諭令文彬籌度辦理茲據奏稱黃流潰決情形實由上游漫溢東省先當其衝江境因而受害等語是直境與東省交界地方應辦河工正未可緩上年李鴻章曾有於直隸河務先辦尾閘各工之請見在辦理情形若何其直東接壤處所應如何妥籌堵禦俾得保護本境卽以捍衛下游之處卽著體察情形妥籌辦理江北一帶自應修補運隄使漫水得歸舊河不至橫溢爲患李宗義當酌量緩急豫籌備禦以衛民生文彬於應行防範之處仍當悉心酌度實力布置毋得徒託空言文彬原摺著鈔給李鴻章李宗義閱看將此由四百里各諭令知之○丙戌諭軍機大臣等總理

各國事務衙門奏日本國兵船已赴臺灣各國船隻亦有駛往福建洋面情事請旨責成前派大員妥速籌策一摺據稱接李宗義咨函內稱日本國兵船於三月下旬有駛進廈門海口者有前往臺灣者由琅璫地方登岸並無阻問之人英國水師提督亦選兵船往臺灣巡南巡查並聞日本購買輪船裝載軍裝糧餉法國及日本兵船均已抵廈日本兵共八營俱在臺灣東海旁起岸欲攻生番本月初開始准李鶴年函稱臺灣道稟報二月閒日本水師官同夥一人抵琅璫柴城一帶查看牡丹社等處形勢繪圖並聲稱牡丹社係屬番界彼自尋釁在我勢難禁止等語生番地方久隸中國版圖與臺灣唇齒相依日本相距尤近且各國均有兵船駛往臺灣道視爲番界尋釁勢難禁止實屬不知緩急見在日本兵船已赴臺灣且有登岸情事亟應迅籌辦法沈葆楨著授爲欽

差辦理臺灣等處海防兼理各國事務大臣以重事權所有福建鎮道等官均歸節制江蘇廣東沿海各口輪船准其調遣俾得與日本及各國按約辯論而於征調兵弁船隻等事亦臻便捷該大臣接奉前旨計已馳赴臺灣一帶著卽體察情形或諭以情理或示以兵威悉心酌度妥速辦理並與潘霨隨時慎密籌辦一面會商文煜李鶴年等督飭鎮道妥爲布置期於消患方萌不得稍涉大意一面將見在辦法及臺灣如何情形迅速奏聞以慰廑繫除江蘇廣東沿海各口輪船用款仍由各該省撥給外所有該大臣需用餉銀著文煜李鶴年籌款源源接濟毋任缺乏應調官兵並著李鶴年迅速撥派毋誤事機○宋延春以病免以潘鼎新爲雲南布政使

前山東布政使

○戊子諭軍機大臣等李鶴年奏日本師船擬

攻臺灣番境相機妥籌一摺據稱日本以土番劫殺該國遭風難

民率領兵船擬攻臺灣番境見已照覆該國將官令其早日回兵
並飭臺灣鎮道按約理論等語日本違約興兵前據總理各國事
務衙門具奏已派沈葆楨潘蔚前往臺灣生番一帶察看與文煜
李鶴年等會商辦理嗣復授沈葆楨爲欽差辦理臺灣等處海防
兼理各國事務大臣見在日本兵船已有登岸情事各國船隻復
駛往福建洋面較李鶴年所奏情形尤爲喫緊著沈葆楨懍遵前
日諭旨與潘蔚慎密籌畫隨時會商文煜李鶴年等悉心布置毋
令侵越方爲妥善並著文煜李鶴年將撥餉撥兵事宜遵旨妥速
籌辦毋誤事機日本是否回兵臺灣鎮道如何與之理論卽著據
實奏聞○己丑陝甘總督左宗棠奏請將陝西省延綏陝安漢中
各鎮協營仍歸總督節制以復舊制從之○癸巳諭軍機大臣等
李鶴年奏日本兵船已

臺灣番境密籌防範並請陳臺灣地利

各摺片日本兵船不候照覆卽行駛赴臺灣登岸紮營李鶴年已
派水陸各營分往鳳山澎湖等處屯紮並調集莊團水師防範臺
境藉壯聲威以期有備無患番地雖居荒服究隸中國版圖其戕
殺日本難民當聽中國持平辦理日本何得遽爾興兵侵軼入境
若謂該國僅與生番尋仇未擾腹地遂聽其蠻觸相爭必爲外國
所輕視更生覬覦釁端固不可開體制更不可失該督惟當按約
理論阻令回兵以敦和好不得以番地異於腹地遂聽其肆意妄
爲也派往琅璫之員與日本如何辯論能否就我範圍著該督據
實奏聞仍隨時會同文煜悉心布置務臻周密沈葆楨計當起程
著懍遵疊次諭旨與潘蔚慎密籌畫會商文煜李鶴年妥爲辦理
毋稍大意近日臺灣番境情形若何著隨時詳細具奏另片奏稱
查辦彰化匪徒各情匪黨雖就殄除恐有餘孽潛藏根株未盡匪

首廖有富亦未就擒著李鶴年檄令臺灣鎮道飭屬一體查拏務將廖有富等按名弋獲盡法懲治毋令死灰復燃○修湖北江陵蒲圻二縣隄工○丙申諭軍機大臣等景廉奏回逆滋擾滋泥泉西泉等處經官軍堵剿獲勝等語此股賊匪隨同白彥虎出關分路滋擾意在阻截我軍餉道見在雖經孔才等帶兵堵擊擒斬悍逆多名惟該逆既經分股且有撲犯北套橋之信是賊眾人數尙多不得以黑茨窩一路均無賊蹤稍形鬆懈仍著景廉飭令派出官軍勤加偵探務將此股逆匪悉數殲除毋貽後患刻下大兵陸續出關張曜一軍業已行抵玉門金順所派各軍分起進發該都統駐紮古城日久聲息自可相通出關各軍見在行抵何處景廉在古城如何布置並著詳悉奏聞將此由四百里諭令知之○移直隸任縣管河縣丞改駐苟各莊○丁酉賜陸潤庠三百三十七

人進士及第出身有差○諭軍機大臣等李鶴年奏日本師船已與生番接仗見籌防範一摺日本並不遵約回兵已與生番接仗卽日移營進剿該國見到輪船七隻尙有鐵甲船及堅固兵船未到此時數端已開自應先事布置嚴密設防以期有備無患江蘇廣東沿海各口輪船前已有旨准歸沈葆楨調遣李鶴年亦擬添調直隸江蘇輪船赴閩防範應需輪船若干隻卽著李鴻章李宗義張樹聲瑞麟張兆棟如數發往以壯聲勢日本被傷者是否止係數人至生番有無被殺被傷之人未據該督奏及生番既居中國土地卽當一視同仁不得謂爲化外游民愬置不顧任其慘遭荼毒事關海疆安危大計未可稍涉疏虞致生後患著沈葆楨懍遵疊次諭旨隨時與潘蔚籌畫會商文煜李鶴年辦理總當消弭邊釁豫遏詭謀方爲不負委任李鶴年所籌自強之策有無把握

是否辦有端倪不得以空言塞責致誤事機○飭廣東等省迅解閩省兵餉○己亥改江蘇蘇松鎮左營守備爲中營陸汛守備並改補千總外委各一○辛丑諭軍機大臣等景廉奏病勢增劇懇請開缺一摺景廉假期屆滿病未就痊覽奏殊深廕繫該都統久居邊塞爲國宣勞見在駐紮古城防勦正當喫緊且金順等隊計已陸續出關尤須聲勢聯絡進取以靖邊陲景廉熟悉情形未便遽易生手仍當顧全大局力疾從公勉爲其難以副委任著再賞假兩箇月在營調理毋庸開缺遇有緊要事件仍著悉心經理毋誤戎機將此由四百里諭令知之

五月壬寅朔諭軍機大臣等文煜李鶴年沈葆楨奏遵旨會籌臺灣防務大概情形一摺覽奏均屬妥協日本上年遭風難民經臺灣商民與熟番救出交回該國轉藉他國積年舊案越境稱兵沈

葆楨等擬將疊次洋船遭風各案摘要照會各國領事其不候照覆卽舉兵入境與生番開仗各情形亦分次照會令其公評曲直並擬購買鐵甲船水雷及各項軍火器械均著照所議行並准其將閩省存款移緩就急酌量動用如有不敷卽照所請暫借洋款以應急需調赴浙江之伏波等輪船著沈葆楨迅速調回直隸江蘇廣東沿海輪船應如何調撥之處著沈葆楨等與李鴻章李宗義張樹聲瑞麟張兆棟咨商妥辦前署臺灣道黎兆棠據沈葆楨奏稱該員洞悉洋情著瑞麟張兆棟飭令卽行起程赴閩以資得力所請設電綫以通消息亦著沈葆楨等迅速辦理該大臣此時計已起程前赴臺灣著卽察看情形妥速籌辦一面詳悉具奏用慰廑繫羅大春潘蔚等到臺後沈葆楨卽與該員等隨時會商辦理該省防務沈葆楨文煜李鶴年當統籌全局妥爲布置另片奏

請派員稽察船政等語沈葆楨見在赴臺著文煜等傳諭前陝西布政使林壽圖前往船廠認真稽查隨時察看海口情形如有緊要事宜與文煜李鶴年妥爲備禦並著會銜具奏○諭瑞麟等奏越南匪徒情形分別籌辦一摺據稱法國已與越南議和並與越南合兵剿辦股匪驅逐流民該匪等有願回內地投首之人見籌辦法等語越南匪徒一經法國會剿難保不奔竄邊境著瑞麟等分飭沿邊帶兵各員隨時偵探嚴密設防如竄回各匪仍敢持械滋擾卽著實力堵剿毋任竄入內地其投首之匪尤應詳查如實係真心悔罪自拔來歸卽飭令交界地方各官妥爲收撫不准攜帶軍器其中有無在內地犯案之人瑞麟等仍當分別辦理並飭各本籍地方官嚴加管束毋令滋生事端如有流落難民遷回內地者妥爲安插總之爲勦爲撫該督等務須妥慎籌辦不可稍涉

輕率致貽後患以重邊防將此由四百里各諭令知之○戊申諭
軍機大臣等榮全奏續獲奸細並前敵獲勝情形一摺逆首小虎
糾合瑪納斯賊匪意圖紛竄經孝順等拏獲奸細訊明賊情當經
派隊於謝家地擊賊獲勝該逆雖經受創難保不復圖竄擾著榮
全飭令孝順福珠禮等勤加偵探嚴密防範並嚴飭沙克都林扎
布進兵會剿毋任遷延該署將軍前調黑龍江馬隊已有旨諭知
景廉飭令吉爾洪額統帶前往西湖並令金順分撥勁旅會合進
剿藉可稍助兵力著卽派員催令迅速前進一俟到營後妥籌布
置亟圖進取另片奏索倫兵餉請飭塔城參贊籌辦等語塔城一
切事宜向由該參贊大臣照例辦理見在榮全既駐塔城所有索
倫俸餉及一切事宜著榮全英廉和衷共濟妥爲籌畫毋得各存
意見致誤事機將此由五百里各諭令知之○己酉夏至祭地

於方澤○王子 上幸圓明園○還宮○諭軍機大臣等沈葆楨等奏據報臺灣近日情形一摺日本已分三路進攻番社生番逃散遂將牡丹社等處焚燒並欲攻龜仔丹社乘隙尋仇意圖深入若再不亟籌辦法則生番更遭荼毒沈葆楨已與潘蔚起程赴臺邀集各國領事公評曲直若能斂兵回國自可消弭釁端儻仍悍然不顧不得遷就因循轉誤事機沈葆楨與潘蔚相度機宜悉心籌辦應如何調撥官兵前往藉壯聲勢之處著會商文煜李鶴年妥速布置以維大局本日有旨諭令王凱泰卽行起程回任毋庸來京陛見該撫回任後著李鶴年隨事和衷商辦以期共濟時艱○諭李鶴年奏閩省海防緊要請飭撫臣迅回本任一摺福建巡撫王凱泰前經行抵蘇州因病奏請開缺當經降旨賞假兩箇月毋庸開缺見在閩省自日本違約興師占踞臺灣牡丹社一帶

該省海防關緊要著李宗義張樹聲卽行傳知該撫速行回任以重地方王凱泰於接奉此旨後卽日起程赴閩毋庸來京陛見不得俟假期屆滿致有遲誤將此由五百里各諭令知之○以祁

世長爲內閣學士

由翰林院侍讀學士遷

○甲寅諭軍機大臣等英廉奏擬

赴東路察看地勢改道安臺一摺據稱俄人見在察罕鄂博山口安設營卡並欲那移塔城東路鄂莫倫臺不准哈薩克雇給牲畜以致差使阻滯英廉見擬親赴東路察看改道安臺仍在察罕鄂博等處安設卡倫等語鄂莫倫一臺旣爲俄人地面往來差使已屬不便見並有窒礙情形自應擇地移設著英廉卽行前往東路詳細察看應由何處安臺並在察罕鄂博等安設卡倫著與榮全悉心商酌妥爲辦理以顧臺路塔城各臺需用駝馬應差著額勒和布多布沁扎木楚懷遵上年十一月二十七日諭旨先行墊款

採買馴駝四百隻騾駝四百隻並隨霍木全分馴馬六百匹騾馬六百匹務於八月以前辦齊卽由英廉派員赴烏領取以資應用墊價若干俟戶部指撥塔城之山東河南安徽等省地丁銀兩無論何省解到卽由額勒和布等照數扣還以清款目將此由五百里各諭令知之○乙卯諭軍機大臣等文麟明春奏回王邁哈默特呈請代懇賞借十年俸銀以補修城垣安輯難夷另頒新印以昭世守並據聲稱該回王每年應支俸銀二千兩該辦事大臣因餉項支絀欠發三年等語上年七月陝回大股密擾哈密圍攻營城該回王等深明大義派選槍手隨同剿辦逆匪因將回王等偪挾西行經官軍搶救回營該回王等困苦情形殊堪矜念自應優加體恤著照所請賞借十年俸銀由戶部發給交該回王所派通事領齎回哈該回王採辦各物准其由臺站運解並著禮部另鑄

該回王印信由驛遞交文麟等轉給祇領原摺著鈔給戶部閱看
將此諭知戶部禮部理藩院並諭令文麟明春知之○丙辰諭內
閣李宗義奏已故提督功績卓著請合建專祠一摺前湖北提督
向榮前江南提督張國樑於咸豐年間先後駐師金陵督兵勦賊
屢著戰功向榮旋以積勞病故張國樑亦殉節丹陽均經奉 旨

優卹茲據該督奏稱該故員等在金陵駐紮最久生平戰績以江
甯爲最著雖未竟全功而保障江南民情愛戴請合建專祠等語
向榮張國樑著准於江甯省城合建一祠由地方官春秋致祭以
彰忠藎○丁巳諭內閣本年十月初十日恭遇 慈禧端佑康頤

皇太后萬壽慶辰謹照乾隆六年 皇太后五旬萬壽加賞八旗
年老人等成案所有在京八旗官員及男婦太監等年六十以上
者均著加以恩賞該部卽遵諭行○諭軍機大臣等都興阿奏分

撥各路客兵剿捕情形一摺前因盛京地方時有馬賊四出紛擾
疊經諭令都興阿等嚴行整飭該官兵及旗民地方官宜如何認
眞緝捕況去歲秋收歉薄當此青黃不接之際尤應加意巡緝以
靖閭閻本日據奏情形雖經各路官兵分投剿捕疊於昌圖界薛
家嶺等處獲賊多名惟餘匪逃匿尙多著名盜首未獲且敢拒捕
戕官致肇帖式依凌阿於田莊臺地方緝賊中槍殞命該匪戴發
乘間逃逸是匪徒肆行無忌緝捕仍未得力何以綏靖地方著都
興阿嚴飭駐紮各路官兵勤加搜緝務將著名匪首悉數弋獲餘
匪一律殲除不准一名漏網致滋延蔓並著志和恭鏜飭屬一體
嚴拏隨時稽查保甲以杜奸宄潛蹤儻該地方官猶敢仍前玩泄
卽著從嚴參辦毋稍寬縱將此由四百里各諭令知之○諭景廉
奏古城防務喫緊馬隊礙難調撥一摺景廉所部吉爾洪額管帶

黑龍江一軍並吉林馬隊二百五十名前經諭令該都統飭由沙山前赴西湖助剿茲據景廉奏稱古城濟木薩地居衝要烏屬逆回時復竄擾三臺滋泥泉及南山一帶並探聞南路安集延見在吐魯番迤東安設馬隊由開展直至齊克騰木地方古城籌防籌剿竭蹶不遑巴哈兩城仍須兼顧所有吉林黑龍江馬隊勢難分撥等語自屬實在情形惟西湖兵力甚單亟須添兵援應常順前次奏撥駐防科布多之察哈爾馬隊五百名尙可移緩就急著托倫布保英卽飭此項馬隊剋日馳赴西湖毋稍延緩金順見在行抵何處該軍兵力較厚一俟抵古城後卽著景廉與金順會商酌撥數營馳往榮全軍營俾資防剿所需駝隻著榮全迅速籌備先期前赴古城接替金順所部官兵西進毋稍遲誤金順一軍糧運著左宗棠懷遵疊次諭旨源源籌解以資飽騰將此由六百里各

諭令知之○停本年秋審朝審人犯句決○戊午諭軍機大臣等瑞麟張兆棟奏查辦東西兩粵交界伏莽疊獲匪犯一摺廣東靈山縣捕屬等處與廣西接壤向多伏莽經瑞麟等派總兵鄭紹忠等馳往會同廣西邊界文武查辦先後拏獲匪犯多名將播標村匪巢平毀仍著瑞麟張兆棟會同劉長佑督飭派出各員於兩粵交界地方嚴搜逸犯並移軍西鄉將該處匪黨悉數殲除以清伏莽欽州逼近越南恐有外匪竄入著瑞麟等嚴飭鄭紹忠等會同地方文武隨時確探妥爲防範毋稍大意將此各諭令知之○己未彗星見○辛酉諭軍機大臣等岑毓英奏按捕著名賊黨殲除首要逆犯遣散降回暨收獲礮械等件各摺片逆首馬德新業經拏獲正法馬應鸞馬尙雄亦經官軍殺斃尋甸州降回數千戶亦已追繳軍火器械分遣回籍辦理甚爲得手該省甫就肅清一切

善後事宜亟應妥籌布置平彝縣屬之馬頭山等處回民二百餘戶與漢民仇怨太深該署督見擬將尋甸州城十里外絕產清查分撥計口授田與漢民閒雜而居惟必須妥慎籌布務使彼此相安不得復相尋釁方爲盡善提督馬如龍寓中礮械等件刻下軍務肅清自不應畱存寓所見經岑毓英收獲先後解交善後局存儲此外各回寨如尙有私藏者自應概行追繳惟須慎重出之不可激成事端沙甸大莊一帶前有洋人來往開化邊界之河口新街亦有洋人帶水手跟丁前來見雖楚回越南難保不再圖窺伺著岑毓英飭令該地方文武隨時認真偵探嚴密防維其餘一切事宜統著該署督酌度情形慎密籌辦以副委任將此由四百里諭令知之○壬戌諭軍機大臣等常順等奏酌擬棍噶扎勒參安插徒眾事宜請仍歸塔城管轄將該呼圖克圖所遞章程開單呈

覽一摺棍噶扎勒參呈遞章程八條經常順等分別酌擬辦理並請將嗣後該呼圖克圖徒眾一切事宜仍歸塔城參贊大臣管轄所奏各節是否妥協額勒和布到任後著卽詳加查察覆覈具奏原摺單著鈔給閱看將此諭令知之○諭吳棠訪緝川省會匪○甲子命崇實馳赴山海關查辦事件○乙丑詔戶部撥銀十九萬餘兩賑奉天災民○丙寅諭軍機大臣等沈葆楨等奏到臺日期籌辦大概情形並番目籲乞歸化臺澎防兵擬另招精壯充補請將臺灣課稅等銀撥充經費各摺片沈葆楨潘蔚先後行抵臺灣察看該處情形沈葆楨給與日本西鄉從道照會詞意頗爲嚴正潘蔚於本月初八日親赴琅嶠面加詰問設防之事自屬萬不容緩沈葆楨等擬於海口建築礮臺安放巨礮使不得停泊兵船北路淡水等處派兵駐紮由提督羅大春督率巡防並另招勁勇多

備軍火等事所籌均是卽著該大臣等分別妥速辦理日本藉口他國積年舊案違約稱兵曲直是非中外共見沈葆楨等務當與之極力理論不得稍涉遷就致誤事機該國如何照覆潘蔚到琅後如何辯論情形著隨時詳悉奏聞以慰廑繫生番本隸中國版圖朝廷一視同仁疊諭該大臣等設法撫綏不得視同化外任其慘罹荼毒見據各社番目籲乞歸化卽著該大臣等酌度機宜妥爲收撫聯絡聲勢以固其心臺澎向用內地班兵率皆疲弱見在因時制宜自不妨變通辦理沈葆楨等擬將班兵疲弱者撤令歸伍另招本地精壯充補事平之後察看情形再行酌辦卽著照所議行臺灣鹽課關稅釐金等款准其儘數截畱撥充海防經費歸臺灣道衙門支銷不敷之款著文煜李鶴年籌撥接濟毋令缺乏○戊辰諭軍機大臣等文煜李鶴年奏籌辦沿海各口防務一

招馬祖澳及白犬洋面已有日本鐵甲船木輪舟在彼游弋並有孟春兵船自廈門測水直至中歧意存恫喝此時防務自應嚴密布置以備不虞覽文煜李鶴年所奏籌防情形半屬空言並無切實辦法當此事機緊要之際若再掉以輕心必致臨時張皇貽誤大局究竟福廈各口何處最爲扼要見應如何設防福甯連江沿海一帶作何準備是否已臻周密著文煜李鶴年悉心籌畫立見施行不得以含混一奏遂爲了事沈葆楨見於淡水等處派兵駐紮由羅大春督率巡防責任綦重仍當遵奉前旨檄令卽日赴臺以資得力著文煜李鶴年另派得力之員統兵駐紮廈門並會商李新燕妥爲籌布近省情形當隨時知照沈葆楨潘霽以期聲息互通○諭見在日本與臺灣生番稱兵構釁疊經據理曉諭仍未遵約退兵近復有兵船在福州口外往來本日據文煜李鶴年奏

請畱提督羅大春暫緩赴臺駐紮廈門一帶以資鎮守但臺灣事
機甚急昨經沈葆楨奏業與潘蔚先後抵臺擬於該處海口建築
礮臺並派兵駐紮淡水等處由羅大春督率巡防是該提督亟應
速赴臺灣省防一時未能兼顧而福州各處海口關繫緊要防守
需人福建水師提督彭楚漢前經李鴻章奏請畱帶直隸練軍暫
緩赴任刻下閩省防務正急著李鴻章卽飭彭楚漢刻日馳赴新
任以重地方直隸練軍卽由該督另揀妥員統帶本日有寄諭沈
葆楨及文煜李鶴年夾板印封各一件李鴻章接到後卽著發交
輪船速爲分別投遞毋稍遲誤將此由六百里諭令知之○辛未
撥德州駐防旗兵二百名青州一百名河南五十名荊州五百五
十名移補杭州駐防兵額○是月減免直隸安州等五州縣被水
上年額賦並緩節年糧租緩徵安徽天長縣被旱本年上半年上忙額賦

並展上年原緩錢糧

六月甲戌 上幸圓明園○還宮○諭軍機大臣等榮全奏逆匪滋擾臺站派隊迎剿添調官兵各情形一摺孝順等拏獲奸細據供烏魯木齊逆首大虎帶領逆黨圖撲西湖等處見在第六臺一帶已有零匪竄擾搶掠臺站孝順等軍有腹背受敵之勢榮全挑選官兵派桂祥統帶往剿卽著飭令該員確探匪蹤實力剿辦與前敵官軍聯絡聲勢迅掃賊氛並著景廉檄令沙克都林扎布等撥兵馳赴西湖援剿毋稍遲緩致誤事機駐防科布多之察哈爾馬隊前諭托倫布保英飭令西進見在塔城需兵孔急著該參贊等卽令此項官兵迅速前往俾資戰守將此由六百里各諭令知之○丙子諭軍機大臣等文煜李鶴年奏布置海防籌撥臺防餉銀軍火並探報日本船隻在五虎口外游弋情形請飭宋慶統兵

赴閩各摺片日本違約稱兵昨據沈葆楨奏報到臺後業經給與照會向其理諭並經潘蔚親赴琅璦面加詰問是否斂兵回國尙未續有奏報見據文煜等奏福州五虎口百餘里外已有該國鐵甲等船在彼游弋是福州廈門等處海防甚爲喫緊文煜等見擬擇要堅築礮臺並飭副將楊廷輝將附近漁人召募成軍免資寇兵卽著迅速妥爲布置並飭總兵孫開華等認真辦理以期有備無患所需水雷及轉輪礮臺等卽著咨商沈葆楨妥爲籌辦以資要需此外沿江沿海如尙有扼要之處亦當豫爲防範毋稍疏懈臺灣近日情形自沈葆楨給與照會之後日本官如何照覆能否就我範圍著沈葆楨等相機妥辦仍隨時奏聞以慰廑繫至提督宋慶一軍見在整理出關雖尙未成行而閩省海防緊要該軍遠在甯夏焉能濟急閩浙兩省皆李鶴年管轄何至乏員調撥如防

軍需人統帶卽著另行揀派以資得力所請飭令宋慶帶兵赴閩之處著毋庸議○己卯諭軍機大臣等沈葆楨等奏理諭倭將稍有端倪仍遵旨加緊籌防並請飭彭楚漢帶隊赴臺各摺片潘蔚偕道員夏獻綸等於五月初八日馳抵琅璦與日本中將西鄉從道反復辯論逐條窮詰西鄉從道理屈詞窮旋以所用兵費無著爲言復經潘蔚據理駁斥彼請一面致書柳原前光一面寄信該國暫不添兵前來沈葆楨等所奏非益嚴警備難望轉圜儻恃其款詞日延一日奸民乘隙搆煽必致事敗垂成等語深合機宜著照所請由北洋大臣調撥久練洋槍隊三千人南洋大臣調撥久練洋槍隊二千人均乘坐輪船赴臺該郡見有兵勇不甚得力李鴻章李宗義務當迅速調派令其剋日起程前往以壯聲勢南北洋防務緊要俟日本兵退後沈葆楨等卽令此項隊伍各歸防所

前據文煜等奏擬畱羅大春駐紮廈門當經降旨仍令迅卽渡臺辦理淡水一帶防務並諭李鴻章檄飭彭楚漢迅赴本任沈葆楨等此時計可接奉前旨所陳臺灣南北路布置情形及令曾元福提倡鄉團各事宜卽著督飭該員等悉心籌辦務臻周妥並偵探日本情形隨時詳悉具奏潘蔚在琅璫時傳各社生番頭目至者百數十人皆稱懇求保護並願設官經理永隸編氓仍著沈葆楨等遵奉疊次諭旨妥爲收撫以固其心所有奏調之前南澳鎮總兵吳光亮浙江候補道劉璈著瑞麟楊昌濬派令迅往臺郡用資任使閩省輪船不敷調撥江蘇廣東沿海各口輪船前有旨准歸沈葆楨調遣卽著於滬局添調數號由吳大廷督帶駛往前諭李鴻章飭彭楚漢赴閩如該提督尙未起程此次調撥之北洋洋槍隊三千人著卽令其統帶迅由輪船馳赴臺灣毋稍遲緩該提督

抵臺後應否畱於該郡督隊辦防之處著該大臣等與文煜李鶴年會商辦理○命前任陝甘總督楊岳斌湖北巡撫曾國荃山東巡撫閻敬銘江蘇巡撫趙德轍丁日昌浙江提督鮑超山西按察使蔣益澧兩淮鹽運使郭嵩燾來京陛見○辛巳予故四川布政使升任巡撫劉蓉事蹟宣付史館入祀名宦祠並附祀總督駱秉章專祠○壬午諭軍機大臣等岑毓英奏烏索寨餘匪已降復叛派兵剿滅一摺逆首柳映蒼糾黨占踞騰越廳屬之烏索寨經提督蔣宗漢等合兵圍剿連破賊壘本年四月間將烏索寨攻克柳映蒼舉火自焚匪黨殺淨盡剿辦尙屬妥速惟該處毗連緬甸野夷恐有漏網餘匪潛行竄伏仍著岑毓英嚴飭蔣宗漢等認真查緝務將匪黨悉數殲除毋畱餘孽將此由五百里諭令知之○予雲南陣亡遊擊顧定侯祭葬世職○癸未諭軍機大臣等本日

文祥奏病仍未痊懇請開缺一摺已明降諭旨再賞假兩箇月俾得安心調理矣數月以來該大臣病體仍未就痊甚深厯繫惟各國交涉事件甚繁刻下日本與生番尋釁辦理亦無頭緒亟須該大臣前赴總理各國事務衙門會同籌畫著文祥不必拘定假期隨時前往該衙門悉心會商妥辦共濟時艱將此諭令知之○諭李鴻章奏遵旨籌派洋槍隊航海馳赴臺防並請調駐陝銘軍東來以備南北海口策應一摺前據沈葆楨等奏請由北洋撥久練洋槍隊三千人南洋二千人馳赴臺灣當經諭令李鴻章李宗義迅速調派茲據李鴻章奏稱直隸防軍拱衛畿輔必須畱備緩急礙難分調南洋槍隊無多亦難酌撥且於兩處抽撥恐兵將素不相習轉致貽誤查有提督唐定奎所統見駐徐州之武毅銘字一軍素習西洋槍礮訓練有年堪以派往等語著照所請卽飭唐定

奎統帶所部步隊六千五百人由徐拔赴瓜洲口分起航海赴臺聽候沈葆楨調遣由李宗義張樹聲飭調滬局輪船暨雇用招商局輪船駛赴瓜州以備該軍東渡並著沈葆楨酌派閩廠兵船入江接載俾期迅速該軍所需月餉軍裝子藥等項仍著源源籌撥毋任稍有缺乏提督彭楚漢著李鴻章飭令星速赴任籌辦防務日本違約稱兵南北洋沿海各口均須嚴密設防自應添調勁兵屯紮適中之地以壯聲援見在陝西防務已鬆著卽亨豫迅飭臬司劉盛藻統率陝防武毅銘軍馬步二十二營星夜兼程拔赴山東濟甯及江南徐州一帶擇要扼紮以備南北海口策應該軍到防後著李鴻章李宗義隨時會商相機調派南北洋防務緊要並著該督等悉心妥籌詳細具奏福州一帶沿海地方文煜李鶴年王凱泰當實力籌防務臻周密不得稍存大意致誤事機日本近

日情形若何著沈葆楨等隨時確探並將應行備豫事宜妥爲區畫卽行奏聞另片奏輪船遲速無常嗣後寄諭沈葆楨等夾板等件除發交齋塹原輪船遞回可期迅速外其餘應仍由驛遞徑發閩省等語覽奏已悉嗣後發交該督飭令遞回之件卽著隨時交原輪船飛速齋遞○大學士文祥因病奏懇開缺得旨文祥著再賞假兩箇月安心調理毋庸開缺○丁亥諭軍機大臣等金順奏督師出關請由關內運糧接濟並懇飭部先那實在鉅款各一摺據稱提督劉宏發見經金順派令統帶各營由巴里坤馳往古城副都統額爾慶額已於五月初九日出關帶隊赴古金順酌帶馬步各隊西進暫紮安西屬境請由關內轉糧接濟等語金順所部各軍全隊西行軍糧最關緊要見在巴里坤古城等處產糧無多須由關內及安敦玉等處運糧接濟方可無誤軍食著左宗棠將

該軍及額爾慶額一軍所需糧石源源運解毋令缺乏劉宏發及額爾慶額各營到古後卽著景廉籌糧供給以期士飽馬騰並著飭令劉宏發等會合各軍實力防剿迅掃逆氛張曜全隊見在行抵何處宋慶暫駐甯夏轉瞬秋涼布置計均就緒著左宗棠將各該軍糧運設法妥籌一面飭令陸續西行以厚兵力據金順奏該軍後隊未能接連開拔所需月餉運費等項頗形緊急非得鉅款難資集事請飭部於庫存四成洋稅項下先行借撥銀一百二十萬兩分爲兩批解至綏遠城將軍衙門收存轉運卽於積欠金順軍餉內由部指撥東南各省歸還庫款等語著戶部速議具奏至各省關奉撥金順軍餉欠解尙多並著該部咨催迅解毋任延宕將此由六百里各諭令知之○予甘肅陣亡知府安保祭葬世職○庚寅予故湖南提督楊鼎勳附祀曾國藩祠○辛卯諭軍機大

臣等都興阿等奏賊匪分股竄擾派隊防剿並探聞賊匪竄踞情形各摺片本年五六月間突有馬步賊匪分股竄擾孤山等處經官兵分隊迎擊疊有斬擒該匪奔竄羅圈溝地方復竄至新兵堡盤踞見經都興阿添派副都統色楞額帶隊往剿卽著該將軍等飭令派出各軍實力勦辦務將此股竄匪悉數殲除毋畱餘孽見在軍務未蒞亟須儲備將材以爲干城之選並著都興阿查明奉省如有久經戰陣謀勇兼優之宿將卽行據實酌保數員用備任使將此各諭令知之○諭沈葆楨等奏續籌防務情形一摺日本復到輪船一隻裝兵二百餘人帶有鐵練農器等件又有輪船駛往後山一帶意存覬覦亟應厚集兵力益嚴警備提督唐定奎一軍著李鴻章檄令星速拔隊兼程前進不得稍涉延緩致誤事機並著沈葆楨李宗義張樹聲遵奉前旨分別飭調船隻妥爲豫備

俾得迅到防所以壯軍威臺灣南北路防守事宜均甚緊要澎湖
守備空虛見添募勇丁一營是否足資捍禦沈葆楨等務當督飭
張其光夏獻綸等妥籌布置嚴密防守北路淡水等處前諭羅大
春前往督防該提督此時當已渡臺並著該大臣等與之會商相
機籌辦日本遣人往句卑南社番經沈葆楨等將該番目陳安生
等招致來郡潘霽見擬駐營鳳山就近相度形勢次第撫綏惟日
本既約牡丹社生番議和並以王字社生番不肯議和有進兵往
攻之說沈葆楨等應如何聯絡番眾之處務宜設法妥辦福州厦
門一帶文煜李鶴年王凱泰見在如何籌防著卽區畫周密詳悉
奏聞○丁酉命服闋內閣學士翁同龢仍在弘德殿行走○予浙
江殉難巡撫羅遵殿安徽陣亡道員咸福建祠○是月蠲緩河南
虞城縣被風被雹本年額賦